

Morning Dogri (NSD) National News Bulletin 20-08-2024

आकाशवाणी

- प्रधानमंत्री नरेन्द्र मोदी होर भारत दौरे पर आए दे मलेशिया दे प्रधानमंत्री अनवर इब्राहिम हुंदे नै चर्चा करगन।
- दपक्खिया सरबंघै दी समीक्षा लेई भारत-जापान मंत्री स्तरीय वार्ता अज्ज नमीं दिल्ली च होग।
- जम्मू कश्मीर च विधानसभा चुनाएं दे पैहले गेड़ लेई अधिसूचना अज्ज जारी कीती जाग।
- कोलकाता डाक्टर मामले दा संज्ञान लैने मगरा सुप्रीम कोर्ट अज्ज इस मामले दी सुनवाई करोग।
- प्रधानमंत्री नरेन्द्र मोदी होरें इस महीने दी 28 तरीक गी शुरू होने आले पैरिस पैरा ओलंपिक्स दे भारतीय दल दे कन्नै गल्बत कीती।

<><><><><><>

Malaysia-PM

प्रधानमंत्री नरेन्द्र मोदी होर अपने मलेशियाई जोड़ीदार दातो सेरी अनवर बिन इब्राहिम अज्ज नमीं दिल्ली च दपक्खियां वार्ता करगन। वार्ता मगरा केई समझौते पर दस्तखत होने दी मेद ऐ। इब्राहिम होर भारत दी त्रऊं दिनें दी राजकीय यात्रा पर कल नमीं दिल्ली पुज्जे। केन्द्रीय जल शक्ति ते रेल राज्य मंत्री वी.सोमन्ना होरें ब्हाई अड्डे पर उंदा सुआगत कीता। मलेशिया दे प्रधानमंत्री दे तौरा पर इब्राहिम हुंदी एह पैहली यात्रा ऐ। अज्ज बडलै राष्ट्रपति भवन दे अहाते च आए दे अतिथि हुंदा ओपचारिक सुआगत कीता जाग। ओहू महात्मा गांधी होरें गी श्रद्धांजलि देने लेई राजघाट जांगन ते ओहदे मगरा दौनें मुख्यें बशकार दपक्खियां चर्चा होग। प्रधानमंत्री मोदी अपने मलेशियाई हमरूतबा हुंदे सम्मान च दपैहरी दी धाम दा सरिस्ता करगन। इब्राहिम हुंदा संजा राष्ट्रपति भवन च राष्ट्रपति द्रौपदी मुर्मू हुंदे नै मुलाकात करने दा कार्यक्रम ऐ।

भारत ते मलेशिया बश्कार निग्गर ऐतिहासक ते सामाजिक सांस्कृतिक सरबंध न। 2015 च प्रधानमंत्री मोदी हुंदी यात्रा दरान दपक्खियां सरबंधें गी उन्नत रणनीतिक सांझेदारी दी स्थिति तगर बधाया गोआ हा।

<><><><><><>

Israel-PM

इजराइल दे प्रधानमंत्री बेजामिन नेतन्याहू होरें येखशलम च अमरीकी विदेशमंत्री एंटनी ब्लिंकन हुंदे नै बंधकें दी रिहाई पर अमरीकी “ब्रिजिंग प्रस्ताह” पर सैहमति दस्सी ऐ। नेतन्याहू हुंदे दफतरै इक ब्यान च आखेआ जे प्रधानमंत्री होरें बंधकें दी रिहाई पर मजूदा अमरीका प्रस्ताहप्रति इजराइल दे धेइयै गी दोहराया। जेहड़ा इजराइल दी सुरक्षा जरूरतें गी ध्यान च रखदा ऐ। ब्यान च पैहली बारी नेतन्याहू होरें सार्वजनिक तौरा कन्नै नमें अमरीका फार्मूले दा समर्थन कीता।

<><><><><><>

India-Japan

भारत ते जापान दो रोजा मंत्री स्तरै दी गल्लबात अज्ज नमीं दिल्ली च संजा'लै लगगोग। जेहृदे च रक्षा मंत्री राजनाथ सिंह ते वदेश मंत्री डॉ. एस.जयशंकर अपने जापानी हमरूतबा किहारा मिनाऊ ते योको कामीकावा बश्कार गल्ल बात होग। दो जमा दो मंत्री स्तरीय गल्लबात दे बाहरें राजनाथ सिंह ते जापान दे रक्षा मंत्री बश्कार बक्खरे तौरा पर बी गल्लबात होने दा कार्यक्रम ऐ। इनें बैठकें दरान दौनें मुखें बश्कार दपक्खी साथ-सैहयोग बधाने दे बक्ख-बक्ख पैहलुएं पर सोच बचार कीता जाग। एहृदे इलावा दौनें मुखें दे सांझे हितें आले क्षेत्रीय ते अंतर्राष्ट्रीय मुद्दें पर बी चर्चा होग।

<><><><><><>

JK-Notification

जम्मू कश्मीर च होने जा'रदे विधानसभा चुनाएं दे पैहले गेड़ लेई अधिसूचना अज्ज जारी कीती जाग। इस गेड़ च 24 विधानसभा हल्के च वोट पोआए जाने न, जिंदे च अनंतनाग, शोपिया, कुलगाम, रामबन, किश्तवाड़ ते डोडा जिले च पौंदे विधानसभा हल्के शामिल न।

इस गेड़ लेई नामांकन दाखल करने दी खीरी तरीक 27 अगस्त होग जिसलै जे दाखल नामांकनें दी जांच पड़ताल दा कम्म ओहदे अगले रोज 28 अगस्त गी कीता जाग। मेदवार जेकर चाहन तां 30 अगस्त तोड़ी अपने नामांकन वापस बी लेई सकदे न। पैहले गेड़ तैहत मतदान 18 सितम्बर गी करोआया जाग। विधानसभा चुनां लेई खीरी मतदाता सूचि बी अज्ज गै जारी कीती जा'रदी ऐ। एहदे कन्नै गै मेद ऐ जे मतदाताएं दी गिनतरी 90 लक्ख होई जाग। केइं सारे विधानसभा हल्के दी नमें सिरेया हदबंदी कीती गेदी ऐ जेहदे बाद विधानसभा दियां सीटां बी 83 कोला बधियै 90 होई गेदियां न।

<><><><><><>

Supreme Court Kolkata

कोलकाता च हाल च गै इक महिला डाक्टर कन्नै दुष्कर्म ते हत्या आले मामले दी सुनवाई अज्ज सुप्रीम कोर्ट च होग। भारत दे मुख्य न्यायधीश डी.वाई.चन्द्रचूड़, न्यायमूर्ति जे.बी. पारदीवाला ते मनोज मिश्रा हुंदी पीठ इस मामले दी सुनवाई करोग। सुप्रीम कोर्ट नै इस मामले च आपूं संज्ञान लेंदे होई एहदीकरने दा फैसला लैता हा। पच्छिम बंगाल दे आर.जी.कर मैडिकल काले ते अस्पताल च होई दी इस घटना गी लेइयै समूलचे मुख् च बरोध प्रदर्शन पिछले केइं दिनें थमां चलै करदे न। मुख्य भरै दे मैडिकल कालेजें ते अस्पताले दे डाक्टर अपनी सुरक्षा गी लेइयै चिंता च न। कोलकाता हाई कोर्ट च इस मामले दी सुनवाई पैहले थमां होआ करदी ऐ। अदालतै इस मामले दी जांच सीबीआई गी सौंपने दा हुक्म जारी कीता हा। पीड़िता दे माता-पिता ते किश होर लोकें पुलिस दी जांच पर बेसंदोखी प्रगट करदे होई कोर्ट च अपनी अर्जी दायर कीती ही।

<><><><><><>

JK-Earthquake

जम्मू कश्मीर च अज्ज बडलै बारामुला जिले च 4.8 दी तेजी आला भूंचाल आया। सोशल मीडिया पोस्ट पर भूंचाल बारे जानकारी रखने आले राष्ट्रीय सिस्मोलोजी केन्द्र नै इस बारे जानकारी दित्ती ऐ। उआं एहदे कारण कुसै जानी जां माली नुक्सान दी कोई खबर नेई ऐ। अधिकारी इस घटना दे बाद स्थिति पर नेडमी तक्क रखा करदे न।

<><><><><><>

India EU Track 1.5 Confrence

भारत ते यूरोपीय संघ अगस्त 21–22 गी ऑनलाइन कट्टरपंथ च मजूदा ते उभरदे खतरे पर चर्चा करने ते अतवाद् ते आतंकवादी घटनाएं गी अंजाम देने आले आस्सेआ ऑनलाइन थाहरें दा पता लाने दा सांझा तौरा पर मकाबला करने लेई ढंग–तरीके पर इक क्षेत्रीय सम्मेलन दी मेजबानी करगन। दो रोजा भारत यूरोप ट्रैक 1.5 सम्मेलन च नमीं दिल्ली च दक्खन एशिया ते यूरोप दे माहिर नीति निर्माता, शिक्षाविद् ते कनून नाफस करने आले संस्थाने दे अधिकारी इक मंच पर किट्ठे होंगन। जेह्ड़े डिजीटल अतवाद् खलाफ लड़ाई च सब्बने थमां अग्गे न। इक प्रेस विज्ञपित च भारत च यूरोपीय संघ दे प्रतिनिधिमंडल नै आखेआ जे यूरोपीय संघ, आयोजन भागीदार ग्लोबल काउंटर टैरोरिसम काउंसलिंग ते विदेश मंत्रालय दे सैहयोग कन्ने मजूदा होर चर्चा लेई 21–23 अगस्त गी इक महत्वपूर्ण क्षेत्रीय सम्मेलन दी मेजबानी करोग। प्रेस विज्ञप्ति मूजब सम्मेलन दा मकसद यूरोपीय संघ दी इंडो–पैसिफिक उरणनीति कन्ने आतंकवाद रोधी संवाद ते सांझेदारी गी बधाना ऐ। जेह्ड़ी इक गैहरी दृष्टिकोण दी मेद करदा ऐ।

<><><><><><>

PM-Paris

प्रधानमंत्री नरेन्द्र मोदी होरें कल पैरिस पैरा ओलंपिक्स च हिस्सा लैने जा'रदे भारतीय खडारिएं कन्ने वीडियो कांफ्रेंसिंग राएं गल्लबात कीती। पैरिस पैरा ओलंपिक्स खेड्डां इस म्हीने दी 28 तरीक कोला शुरू होआ'रदियां न। गल्लबात दरान मोदी होरें आखेआ जे पैरिस जाने आले खडारी भारत दा झंडा फगडियै देश दे प्रतिनिधि दे रूपै च जा'रदे न ते एह यात्रा उंदे जीवन ते उंदी खेड्ड लेई बड़ा मता महत्व रखदी ऐ। मोदी होरें आखेआ जे 140 करोड़ देशवासी इनें खडारिएं गी अपना शीरवाद ते शुभकामनां देआ करदे न। तोआइं खेड्ड मंत्री मनसुख मांडविया होरें आखेआ ऐ जे ऐकती पैरा ओलंपिक्स च भारत अजें तोड़ी दा सब्बने शा बड्डा दल भेजा करदा ऐ। उनें दस्सेआ जे कुल 84 प्रतिभावान खडारी पैरिस पैरा ओलंपिक्स च भारत दी नुमायंदगी करै करदे न।

<><><><><><>

Law Minister

विधि ते न्याय राज्यमंत्री अर्जुन राम मेघवाल होरें लेटरल एंट्री दे मुद्दे पर कांग्रेस पार्टी दी सख्त नुख्तीचीनी करदे होई आखेआ ऐ जे कांग्रेस सरकार नै अपने कार्जकाल दरान लेटरल एंट्री आली पित्त दी शुरूआत कीती ही। उनें आखेआ जे साबका प्रधानमंत्री डॉ. मनमोहन सिंह हुंदे सनें केई अधिकारी लेटरल एंट्री आली बवसी राएं सरकार च शामिल होए हे। मेघवाल होरें अगो आखेआ जे प्रधानमंत्री नरेन्द्र मोदी होरें इस बवस्था च बदलाव करदे होई लेटरल एंट्री गी होर मता बवस्थित कीता ऐ।

<><><><><><>